

尔时，金刚藏菩萨欲重明此义而说偈言：

“菩萨住七地，慧方便已得，  
善集助道法，大愿之所系，  
诸佛神力护，善根悉成就，  
求于胜智故，能入第八地。  
善集于福德，而有深慈悲，  
离诸有量心，心同如虚空。  
如所说法中，心得决定力，  
如是得寂灭，微妙无生忍。  
诸法从本来，无生亦无灭，  
无相亦无出，不失亦不行；  
诸法初中后，与如无分别，  
无有心意行，同若如虚空。  
成就如是忍，无有诸戏论，  
得是不动地，甚深寂灭行。  
一切诸世间，不能得测量；  
一切诸心相，皆悉已坏尽。  
菩萨住是地，心识无分别，  
如入灭尽定，无念想分别。  
犹如人梦中，遽欲行渡水，  
觉则心廓然，自知无所作。

得是深忍已，一切想念灭，  
亦如诸梵王，无欲界烦恼。  
先以愿力护，诸佛今劝言：  
‘如是第一忍，是诸佛职位。  
我等深智力，无畏不共法，  
汝既无有此，当加勤精进。  
汝今虽得灭，一切烦恼火，  
当观诸世间，烦恼常炽然。  
当念本所愿，欲利诸众生，  
悉遍知诸法，广度于一切。  
诸法实性相，常住无变异，  
二乘亦得此，不以得名佛；  
但以得无碍，甚深微妙智，  
通达三世故，乃得名为佛。  
是诸无等等，天人所恭敬，  
开是众智门，令入诸佛法。  
成就无边底，无量妙智慧，  
先所行诸法，不及今一念。’  
如是诸菩萨，得妙智慧地，  
能在一念中，身遍于十方。  
入是智慧门，行道疾无碍，

如行于大海，风力令去疾。  
离诸功用心，但在于智业，  
观十方世界，成坏及与住；  
能知四大一，亦知种种异，  
小大无量相，种种诸差别；  
能数知三千，大千界微尘，  
亦知众生身，四大微尘数；  
诸天身众宝，微尘数差别，  
皆悉遍照了，余亦如是知。  
智慧因缘故，心转得调柔，  
为利诸众生，遍诸世界身；  
能于众生身，而自作己身，  
及诸佛世界，诸余种种身。  
如日月随风，影现一切水；  
菩萨亦如是，随顺智慧风，  
常住于法性，湛然不移动，  
于净心众生，各现其身像。  
随诸心所乐，而现为受生，  
于诸人天会，悉皆示其身。  
菩萨于因缘，和合中自在，  
乃至能随意，而为现佛身。

众生国土身，业报贤圣身，  
智身与法身，知皆同平等。  
以是因缘故，得如意神通，  
为令世欢喜，而现种种身。  
能得于十种，妙大自在智，  
所作随智行，顺于慈悲心。  
诸佛所有法，皆能善修习，  
住三净业中，不动如须弥。  
能得大菩萨，所有十种力<sup>1</sup>，  
一切诸魔众，皆所不能转。  
常为诸佛护，释梵所敬礼，  
密迹金刚神，常随而侍卫。  
菩萨得是地，功德无有量，  
百千万亿劫，说之不可尽。  
得近无数佛，增益诸善根，  
如真金杂宝，庄严在王颈。

<sup>1</sup> 能得大菩萨，所有十种力：

《大智度论》云：

[问曰：佛有十力、四无所畏，菩萨有不？]

答曰：有。何者是？一者、发一切智心，坚深牢固力；二者、具足大慈故，不舍一切众生力；三者、不须一切供养恭敬利故，具足大悲力；四者、信一切佛法，具足生一切佛法及心不厌故，大精进力；五者、一心慧行威仪不坏故，禅定力；六者、除二边故，随十二因缘行故，断一切邪见故，灭一切忆想分别戏论故，具足智慧力；七者、成就一切众生故，受无量生死故，集诸善根无厌足故，知一切世间如梦故，不厌生死力；八者、观诸法实相故，知无吾我、无众生故，信解诸法不出生不生故，无生法忍力；九者、入空、无相、无作解脱门观故，知见声闻、辟支佛解脱故，得解脱力；十者、深法自在故，知一切众生心行所趣故，具足无碍智力。是为菩萨十力。]

菩萨在是地，多作大梵王，  
典领<sup>2</sup>千国土，功德富无量。  
能以三乘教，而无有穷尽，  
慈心光普照，破诸烦恼热。  
若欲于须臾，能得百三千，  
大千世界数，微尘诸三昧。  
能见十方佛，其数亦如是，  
若以其愿力，过是无有量。  
今已略解说，第八地妙相，  
若广演说者，千亿劫不尽。”]

《摩诃般若波罗蜜经·发趣品》云：

[ “复次，须菩提，菩萨摩訶萨住八地中应具足五法。何等五？顺入众生心；  
游戏诸神通；见诸佛国；如所见佛国，自庄严佛国；如实观佛身，自庄严佛身。是  
名五法具足满。

复次，须菩提，菩萨摩訶萨住八地中，复具足五法。何等五？知上下诸根；净  
佛国土；入如幻三昧；常入三昧；随众生所应善根受身。须菩提，是为菩萨摩訶萨  
住八地中具足五法。” ]

《大智度论》云：

[ 【经】云何菩萨顺入众生心？菩萨以一心知一切众生心及心数法。

<sup>2</sup> 典领：拼音 diǎn lǐng，指主持领导、主管。

云何菩萨游戏诸神通？以是神通从一佛国至一佛国，亦不作佛国想。

云何菩萨观诸佛国？自住其国，见无量诸佛国，亦无佛国想。

云何菩萨如所见佛国？自庄严其国，住转轮圣王地，遍至三千大千世界以自庄严。

云何菩萨如实观佛身？如实观法身故。是为菩萨住八地中具足五法。

云何菩萨知上下诸根？菩萨住佛十力，知一切众生上下诸根。

云何菩萨净佛世界？净众生故。

云何菩萨如幻三昧？住是三昧，能成办一切事，亦不生心相。

云何菩萨常入三昧？菩萨得报生三昧故。

云何菩萨随众生所应善根受身？菩萨知众生所应生善根而为受身成就众生故。是为菩萨住八地中具足五法。

**【论】论者言：**顺入众生心者，菩萨住是八地中，顺观一切众生心之所趣，动发思惟，深念顺观，以智慧分别：知是众生永无得度因缘；是众生过无量阿僧祇劫然后可度；是众生或一劫二劫，乃至十劫可度；是众生或一世二世，乃至今世可度；是众生或即时可度者，是熟是未熟；是人可以声闻乘度，是人可以辟支佛乘度。譬如良医诊病，知瘥久近，可治不可治者。

游戏诸神通者，先得诸神通，今得自在游戏，能至无量无边世界。菩萨住七地中时，欲取涅槃。尔时，有种种因缘，及十方诸佛拥护，还生心欲度众生；好庄严神通，随意自在，乃至无量无边世界中无所挂碍，见诸佛国，亦不取佛国相。

观诸佛国者，有菩萨以神通力飞到十方，观诸清净世界，取相欲自庄严其国。有菩萨佛将至十方，示清净世界，取净国相，自作愿行；如世自在王佛，将法积比丘至十方，示清净世界<sup>3</sup>。或有菩萨自住本国，用天眼见十方清净世界，初取净相，后得不著心故还舍。如所见佛国，自庄严其国者，如先说。是八地名转轮地，如转轮圣王宝轮至处，无碍无障，无诸怨敌；菩萨住是地中，能雨法宝，满众生愿，无能障碍，亦能取所见净国相而自庄严其国。

如实观佛身者，观诸佛身如幻如化，非五众、十二入、十八界所摄，若长若短，若干种色，随众生先世业因缘所见。此中佛自说：“见法身者，是为见佛<sup>4</sup>”。法身者，不可得法空；不可得法空者，诸因缘边生法，无有自性。

知上下诸根者，如十力中说。菩萨先知一切众生心所行，谁钝谁利？谁布施多？谁智慧多？因其多者而度脱之。

净佛世界者，有二种净：一者、菩萨自净其身；二者、净众生心，令行清净道。以彼我因缘清净故，随所愿得清净世界。

入如幻三昧者，如幻人一处住，所作幻事，遍满世界，所谓四种兵众<sup>5</sup>、宫殿城郭、饮食歌舞、杀活忧苦等。菩萨亦如是，住是三昧中，能于十方世界变化，遍满其中：先行布施等充满众生；次说法教化，破坏三恶道，然后

<sup>3</sup>《大智度论·序品》云：“问曰：更有十方诸清净世界，如阿弥陀佛安乐世界等，何以故但以普华世界为喻？答曰：阿弥陀佛世界不如华积世界。何以故？法积比丘，佛虽将至十方观清净世界，功德力薄，不能得见上妙清净世界。以是故，世界不如。”

<sup>4</sup>见法身者，是为见佛：

一、《摩诃般若波罗蜜经·发趣品》云：“云何菩萨如实观佛身？如实观法身故。”

二、《佛说大乘稻芊经》云：“今日世尊观见稻芊，告诸比丘，作如是说：‘诸比丘！若见因缘，彼即见法；若见于法，即能见佛。’”

<sup>5</sup>四种兵众：象兵、马兵、车兵、步兵。

安立众生于三乘；一切所可利益之事，无不成就。是菩萨心不动，亦不取心相。

常入三昧者，菩萨得如幻等三昧，所役心能有所作；今<sup>6</sup>转身得报生三昧<sup>7</sup>，如人见色，不用心力。住是三昧中，度众生安隐，胜于如幻三昧，自然成事，无所役用。如人求财，有役力得者，有自然得者。

随众生所应善根受身者，菩萨得二种三昧、二种神通，行得、报得；知以何身，以何语，以何因缘，以何事，以何道，以何方便而为受身，乃至受畜生身而化度之。（八地竟。）]

菩萨当如《维摩诘所说经·佛国品》中所说而修习净佛国土。

《维摩诘所说经·佛国品》云：

[尔时，长者子宝积说此偈已，白佛言：‘世尊！是五百长者子，皆已发阿耨多罗三藐三菩提心，愿闻得佛国土清净，唯愿世尊说诸菩萨净土之行。’佛言：‘善哉！宝积！乃能为诸菩萨，问于如来净土之行，谛听！谛听！善思念之！当为汝说。’于是宝积及五百长者子，受教而听。

佛言：‘宝积！众生之类是菩萨佛土。所以者何？菩萨随所化众生而取佛土，随所调伏众生而取佛土，随诸众生应以何国入佛智慧而取佛土，随诸众生应以何国起菩萨根而取佛土。所以者何？菩萨取于净国，皆为饶益诸众生故。譬如有人，欲于空地，造立宫室，随意无碍，若于虚空，终不能成！菩萨如是，为成就众生故，愿取佛国，愿取佛国者，非于空也。’

<sup>6</sup> 今=念【宋】【元】【明】【宫】。

<sup>7</sup> 八地得二种三昧：如幻三昧；报生三昧。

‘宝积当知，直心是菩萨净土，菩萨成佛时，不谄众生来生其国；深心是菩萨净土，菩萨成佛时，具足功德众生来生其国；大乘心是菩萨净土，菩萨成佛时，大乘众生来生其国；布施是菩萨净土，菩萨成佛时，一切能舍众生来生其国；持戒是菩萨净土，菩萨成佛时，行十善道满愿众生来生其国；忍辱是菩萨净土，菩萨成佛时，三十二相庄严众生来生其国；精进是菩萨净土，菩萨成佛时，勤修一切功德众生来生其国；禅定是菩萨净土，菩萨成佛时，摄心不乱众生来生其国；智慧是菩萨净土，菩萨成佛时，正定众生来生其国；四无量心是菩萨净土，菩萨成佛时，成就慈悲喜舍众生来生其国；四摄法是菩萨净土，菩萨成佛时，解脱所摄众生来生其国；方便是菩萨净土，菩萨成佛时，于一切法方便无碍众生来生其国；三十七道品是菩萨净土，菩萨成佛时，念处、正勤、神足、根、力、觉、道众生来生其国；回向心是菩萨净土，菩萨成佛时，得一切具足功德国土；说除八难<sup>8</sup>是菩萨净土，菩萨成佛时，国土无有三恶八难；自守戒行不讥彼阙是菩萨净土，菩萨成佛时，国土无有犯禁之名；十善是菩萨净土，菩萨成佛时，命不中天，大富梵行，所言诚谛；常以软语，眷属不离，善和斗讼。言必饶益，不嫉不恚，正见众生来生其国。如是宝积，菩萨随其直心，则能发行；随其发行，则得深心；随其深心，则意调伏；随意调伏，则如说行；随如说行，则能回向；随其回

<sup>8</sup> 八难：《劝发诸王要偈》云：

邪见三恶趣，不闻佛法音，  
边地暗冥处，聋瘖长寿夭，  
王已离八难，得此无碍身，  
宜应修善业，方便求泥洹。

向，则有方便<sup>9</sup>；随其方便，则成就众生；随成就众生，则佛土净；随佛土净，则说法净；随说法净，则智慧净；随智慧净，则其心净；随其心净，则一切功德净。是故宝积，若菩萨欲得净土，当净其心；随其心净，则佛土净。’

尔时，舍利弗承佛威神作是念：若菩萨心净，则佛土净者，我世尊本为菩萨时，意岂不净，而是佛土不净若此？佛知其念，即告之言：‘于意云何？日月岂不净耶！而盲者不见。’对曰‘不也！世尊！是盲者过，非日月咎。’‘舍利弗！众生罪故，不见如来国土严净，非如来咎；舍利弗！我此土净，而汝不见。’

尔时，螺髻梵王语舍利弗：‘勿作是念，谓此佛土以为不净，所以者何？我见释迦牟尼佛土清净，譬如自在天宫。’舍利弗言：‘我见此土丘陵坑坎，荆棘沙砾，土石诸山，秽恶充满。’螺髻梵王言：‘仁者心有高下，不依佛慧，故见此土为不净耳！舍利弗！菩萨于一切众生，悉皆平等，深心清净，依佛智慧，则能见此佛土清净<sup>10</sup>。’

于是佛以足指按地，即时三千大千世界，若干百千珍宝严饰，譬如宝庄严佛，无量功德宝庄严土，一切大众叹未曾有！而皆自见坐宝莲华。佛告舍利弗：‘汝且观是佛土严净？’舍利弗言：‘唯然，世尊！本所不见，本所不闻，今佛国土严净悉现。’佛语舍利弗：‘我佛国土，常净若此，为欲度斯

<sup>9</sup> 方便：一、不堕轮回的方便；二、不堕声缘二乘的方便；三、普度众生的方便。

<sup>10</sup> 《圆觉经》云：

众生国土，同一法性，  
地狱天宫，皆为净土。

下劣人故，示是众恶不净土耳！譬如诸天，共宝器食，随其福德，饭色有异；如是舍利弗，若人心净，便见此土功德庄严<sup>11</sup>。’

当佛现此国土严净之时，宝积所将五百长者子，皆得无生法忍，八万四千人皆发阿耨多罗三藐三菩提心。佛摄神足，于是世界，还复如故；求声闻乘，三万二千诸天及人，知有为法，皆悉无常，远尘离垢，得法眼净；八千比丘，不受诸法，漏尽意解。]

---

<sup>11</sup> 《大乘本生心地观经》云：

以清净心为善业根，以不善心为恶业根，  
心清净故世界清净，心杂秽故世界杂秽。